

摩

訶

止

觀

摩訶止觀卷第五上

天台智者大師說

△第七正修止觀者前六重依修多羅以開妙解今依妙解以立正行膏明相賴目足更資行解既勤三障四魔紛然競起重昏巨散翳動定明不可隨不可畏隨之將人向惡道畏之妨修正法當以觀觀昏卽昏而朗以止止散卽散而寂如猪揩金山衆流入海薪熾於火風益求羅耳此金剛觀割煩惱陣比牢強足越生死野慧淨於行行進於慧照潤導達交絡瑩飾一體二手更互揩摩非但開拓遮障內進已道又精通經論外啓未開自匠匠他兼利具足人師國寶

非此是誰而復學佛慈悲無諸慳恪說於心觀施於  
彼者卽是開門傾藏捨如意珠此珠放光而復雨寶  
照闇豐乏朗夜濟窮馳二輪而致遠翥兩翅以高飛  
玉潤碧鮮可勝言哉香城粉骨雪嶺投身亦何足以  
報德快馬見鞭影卽著正路其癡鈍者毒氣深入失  
本心故旣其不信則不入手無聞法鉤故聽不能解  
乏智慧眼不別真僞舉身痺癩動步不前不覺不知  
大罪聚人何勞爲說設獸世者翫下劣乘攀附枝葉  
狗狎作務敬獼猴爲帝釋宗瓦礫是明珠此黑闇人  
豈可論道又一種禪人不達他根性純敎乳藥體心  
踏心和融覺見若泯若了斯一轍之意障難萬途紛

然不識纔見異相卽判是道自非六器復闕匠他盲  
跛師徒二俱墮落瞽蹶夜遊甚可憐愍不應對上諸  
人說此止觀夫止觀者高尚者高尚卑劣者卑劣開  
止觀爲十一陰界入二煩惱三病患四業相五魔事  
六禪定七諸見八增上慢九二乘十菩薩此十境通  
能覆障陰在初者二義一現前二依經大品云聲聞  
人依四念處行道菩薩初觀色乃至一切種智章章  
皆爾故不違經又行人受身誰不陰入重擔現前是  
故初觀後發異相別爲次耳夫五陰與四大合若不  
照察不覺紛馳如閉舟順水寧知奔迸若其迴泝始  
覺馳流旣觀陰果則動煩惱因故次五陰而論四分

也四大是身病三毒是心病以其等故情中不覺念  
大分俱觀衝擊脈藏故四蛇偏起致有患生無量諸  
業不可稱計散善微弱不能令動今修止觀健病不  
虧動生死輪或善萌故動惡壞故動善示受報故動  
惡來責報故動故次病說業也以惡動故惡欲滅善  
動故善欲生魔遽出境作諸留難或壞其道故次業  
說魔若過魔事則功德生或過去習因或現在行力  
諸禪競起或味或淨或橫或豎故次魔說禪禪有觀  
支因生邪慧逸觀於法僻起諸倒邪辯猛利故次禪  
說見若識見爲非息其妄著貪瞋利鈍二俱不起無  
智者謂證涅槃小乘亦有橫計四禪爲四果大乘亦

有魔來與記並是未得謂得增上慢人故次見說慢  
見慢既靜先世小習因靜而生身子捨眼卽其事也  
大品云恒沙菩薩發大心若一若二入菩薩位多墮  
二乘故次慢說二乘若憶本願故不墮空者諸方便  
道菩薩境界卽起也大品云有菩薩不久行六波羅  
密若聞深法卽起誹謗墮泥梨中此是六度菩薩耳  
通教方便位亦有謗義入真道不謗也別教初心知  
有深法是則不謗此等悉是諸權善根故次二乘後  
說也此十種境始自凡夫正報終至聖人方便陰入  
一境常自現前若發不發恒得爲觀餘九境發可爲  
觀不發何所觀又八境去正道遠深加防護得歸正

轉二境去正道近至此位時不慮無觀薄修卽正又  
若不解諸境互發大起疑網如在岐道不知所從先  
若聞之恣其愛怪心安若空互發有十謂次第不次  
第雜不雜具不具作意不作意成不成益不益久不  
久難不難更不更三障四魔九雙七隻次第者有三  
義謂法修發法者次第淺深法也修者先世已曾研  
習次第或此世次第修也發者依次修而次發也不  
次亦三義謂法修發發則不定或前發菩薩境後發  
陰入雖不次第十數宛足修者若四大違返則先修  
病患若四分增多則先修煩惱如是一一隨強者先  
修法者眼耳鼻舌陰入界等皆是寂靜門亦是法界

何須捨此就彼出寶篋經云當知法界外更無復有  
法而爲次第也煩惱卽法界如無行經云貪欲卽是  
道淨名云行於非道通達佛道佛道旣通無復次第  
也病患是法界者淨名云今我病者非真非有衆生  
病亦非真非有以此自調亦度衆生方丈託疾雙林  
病行卽其義也業相爲法界者業是行陰法華云深  
達罪福相徧照於十方微妙淨法身具相三十二達  
業從緣生不自在故空此業能破業若衆生應以此  
業得度示現諸業以此業立業業與不業縛脫叵得  
普門示現雙照縛脫故名深達何嘗堪爲方等師卽  
魔事爲法界者首楞嚴云魔界如佛界如一如無

如實際中尚不見佛況見有魔耶設有魔者良藥塗  
屣堪任乘御云禪爲法界者能觀心性名爲上定卽  
首楞嚴不昧不亂入王三昧一切三昧悉入其中見  
爲法界者淨名云以邪相入正相於諸見不動而修  
三十七品又動修不動修亦動亦不動修非動非不  
動修三十七品以見爲門以見爲侍慢爲法界者還  
是煩惱耳觀慢無慢慢大慢非慢非不慢成祕密藏  
入大涅槃二乘爲法界者若但見於空不見不空云  
智者見空及與不空決了聲聞法是諸經之王聞已  
諦思惟得近無上道菩薩境爲法界者底惡生死下  
劣小乘尚卽是法界況菩薩法寧非佛道又菩薩方

便之權卽權而實亦卽非權非實成祕密藏入大涅槃是一一法皆卽法界是爲不次第法相也雜不雜者發一境已更發一境歷歷分明是爲不雜適發陰入復起煩惱煩惱未謝復業復魔禪見慢等交橫並沓是爲雜發雖雜不出十種具不具者十數足名具九去名不具次不次雜不雜皆論具不具又總具總不具別具別不具十數足是總具十數不委悉是總不具九數欠是別不具九數中委悉是別具又橫具橫不具豎具豎不具例如發四禪至非想是豎具至不用處是豎不具發通明背捨等是橫具止發七背捨是橫不具又發初禪至四禪是豎具三禪來是豎

不具又初禪九品是豎具八品來是豎不具又一品  
五支足是橫具四支已來是橫不具其餘例此可知  
云修不修者作意修陰界入界入開解是修發不作  
意陰界入自發通達色心是不修法乃至菩薩境亦  
如是應有四句爲根本句句織成三十六句例如下  
煩惱境中說成不成者若發一境究竟成就成就已  
謝更發餘境餘境亦究竟成若發一種乍起乍滅非  
但品數缺少於分分中亦曖昧不明前具不具止明  
頭數此中論體分始終益不益者或發惡法於止觀  
巨益明靜轉深或發善法於止觀大損損其靜照或  
增靜損照或損靜增照俱增俱損難發不難發者或

惡法難易或善法難易俱難俱易久不久者自有一境久久不去或有一境卽起卽去云更不更者自有一境一更兩更乃至多多自有一境一發卽休後不復發如是等種種不同善識其意莫謬去取然皆以止觀研之使無滯也三障四魔者普賢觀云闇浮提人三障重故陰入病患是報障煩惱見慢是煩惱障業魔禪二乘菩薩是業障障止觀不明靜塞菩提道令行人不得通至五品六根清淨位故名爲障四魔者陰入正是陰魔業禪二乘菩薩等是行陰名爲陰魔煩惱見慢等是煩惱魔病患是死因名死魔魔事是天子魔魔名奪者破觀名奪命破止名奪身又魔

名磨訛磨觀訛令黑闇磨止訛令散逸故名爲魔云  
問何意互發荅皆由二世因緣昔有漸觀種子今得  
修行之雨卽次第發昔有頓觀種子卽不次第發昔  
有不定種子卽雜發昔修時數具卽具發昔修時數  
不具卽不具發昔曾證得今發則成昔但修不證今  
發不成昔因強今不修而發今緣強待修而發昔因  
今緣二俱善巧迴向上道今發則益昔因緣中雜毒  
是則致損發所因處弱則不久發因處強是則久麗  
細住乃至四禪傳傳判強弱云善易發關遮輕善難  
發由遮重惡難發由根利惡易發由根鈍惡欲滅而  
告謝善欲生而相知則一而不更善欲滅而求救惡

欲興而求受則更更更此中皆須口決用智慧籌  
量不得師心謬判是非爾其慎之勤之重之私料簡  
者法若塵沙境何定十荅譬如大地一能生種種芽  
數方不廣略令義易明了故言十耳問十境通別云  
何荅受身之始無不有身諸經說觀多從色起故以  
陰爲初耳以陰本陰因陰患陰主善陰又陰因別陰  
等云通言煩惱者見慢同煩惱陰入病是煩惱果業  
是煩惱因禪是無動業業卽煩惱用魔卽統欲界卽  
煩惱主二乘菩薩卽別煩惱攝云通稱病患者陰界  
入卽病本煩惱見慢等卽是煩惱病淨名云今我病  
者皆從前世妄想諸煩惱生業亦是病大經云王今

病重卽指五逆爲病也魔能作病三災爲外過患端  
息喜樂是內過患禪有喜樂卽病患也二乘菩薩卽  
是空病空病亦空通稱業者陰入是業果煩惱見慢  
是業本病是業報魔是魔業禪是無動業二乘菩薩  
是無漏業通稱魔者陰入卽陰魔煩惱見慢卽煩惱  
魔病是死魔魔卽天子魔餘者皆是行陰魔攝通稱  
禪定者禪自是其境陰入煩惱見慢業等悉是十大  
地中心數定攝魔是未到地定果亦是心數定攝二  
乘菩薩淨禪攝又三定攝之上定攝菩薩二乘中下  
二定攝八境云通稱見者陰入卽我見衆生見煩惱  
具五見病壽者命者見業禪等作者見亦是戒取見

魔是使作者使受者使起等攝又生死卽邊見攝慢  
卽我見攝二乘方便菩薩等皆曲見攝通稱慢者陰  
入我慢攝煩惱卽慢慢攝病患不如慢攝業卽憍慢  
攝由憍故造業魔卽大慢攝禪卽憍慢攝見亦大慢  
攝二乘菩薩增上慢攝通稱二乘者四念處四諦法  
攝九境也通攝菩薩境者以四弘誓攝得九境問境  
法名俱通者行人亦通不答大經云云何未發心而  
名爲菩薩前九境人亦通稱菩薩人也通是二乘則  
有四種聲聞增上慢聲聞攝得下八境人也佛道聲  
聞攝得菩薩人也問通是無常不答實性論云菩薩  
住無漏界中有無常倒問通是有漏不答漏義則攝

有義小異問通是偏真不答偏義則通真義異問通  
義可領別復云何答十境不同卽別義也復有亦通  
亦別陰是受身之本又是觀慧之初所以別當其首  
此一境亦通亦別後九境從發異相受名但得是通  
是別不得是亦通亦別也若爾煩惱亦是諸法之本  
元爲治惑亦是觀初病身四大亦是事本元爲治病  
亦是觀初何意不得亦通亦別答若身因煩惱屬前  
世若今世煩惱由身而有病不恒起爲本事弱諸經  
論不以病爲觀首故不亦通亦別耳非通非別者皆  
不思議一陰一切陰非一非一切問九境相起更立  
別名者陰入解起應立別名答陰解起時非條然別

還是陰入攝若執此解卽屬見若約解起愛恚屬煩惱招病來魔隨事別判若解發朗然無九境相者此則止觀氣分但得通別不得亦通亦別耳問十境條然別不答四念處是陰別觀空聚是入別無我是界別五停心煩惱別八念病別十善業別五繫魔別六妙門禪別道品見別無常苦空慢別四諦十二緣二乘別六度菩薩別問五陰俱是境色心外別有觀耶答不思議境智卽陰是觀亦可分別不善無記陰是境善五陰是觀觀旣純熟無惡無無記唯有善陰善陰轉成方便陰方便陰轉成無漏陰無漏陰轉成法性陰謂無等等陰豈非陰外別有觀耶小乘尚爾況

不思議耶問若轉陰爲觀報陰亦應轉答大品云色  
淨故受想行識淨般若亦淨法華云顏色鮮白六根  
清淨卽其義也陰雖轉觀境宛然云問十境與五分  
云何答五分判禪十發約境今當會之若次不次  
發至後則進分也齊九已來住分也作意矜持護分  
也一發卽失退分也達分可知若於境境皆作五分  
者可以意推不俟分別然五分十境皆是法相可得  
互有其義六卽十地行位淺深不得相類問念性離  
緣性亦離若無緣無念亦無數量云何具十法界耶  
答不可思議無相而相觀智宛然他解須彌容芥芥  
容須彌火出蓮花人能渡海就希有事解不思議今

解無心無念無能行無能到不思議理理則勝事問  
十法界互相有爲因爲果荅俱相有而果隔難顯因  
通易知如慈童女以地獄界發佛心如未得記菩薩  
輕得記者若不生悔無出罪期更引諸例凡聖皆具  
五陰不可言聖陰如凡陰又佛具五眼豈可以人天  
果報釋佛眼佛具五行病行是四惡界嬰兒行是人  
天界聖行是二乘法界梵行是菩薩法界天行是佛  
法界問一念具十法界爲作念具爲任運具荅法性  
自爾非作所成如一微塵具十方分云○第一觀陰  
入界境者謂五陰十二入十八界也陰者陰蓋善法  
此就因得名又陰是積聚生死重沓此就果得名入

者涉入亦名輪門界名界別亦名性分毗婆沙明三  
科開合若迷心開心爲四陰色爲一陰若迷色開色  
爲十入及一入少分心爲一意入及法入少分若俱  
迷者開爲十八界也數人說五陰同時識是心王四  
陰是數約有門明義故王數相扶同時而起論人說  
識先了別次受領納想取相貌行起違從色由行感  
約空門明義故次第相生若能生所生從細至麤  
故識在前若從修行從麤至細故色在前皆不得以  
數隔王若論四念處則王在中此就言說爲便耳又  
分別九種一期色心名果報五陰平平想受無記五  
陰起見起愛者兩汗穢五陰動身口業善惡兩五陰

變化示現工巧五陰五善根人方便五陰證四果者  
無漏五陰如是種種源從心出正法念云如畫師手  
畫出五彩黑青赤黃白白白畫手譬心黑色譬地獄  
陰青色譬鬼赤譬畜黃譬脩羅白譬人白白譬天此  
六種陰止齊界內若依華嚴云心如工畫師畫種種  
五陰界內界外一切世間中莫不從心造世間色心  
尚叵窮盡況復出世寧可凡心知凡眼翳尚不見近  
那得見遠彌生曠劫不覩界內一隅況復界外邊表  
如渴鹿逐炎狂狗齧雷何有得理縱令解悟小乘終  
非大道故大集云常見之人說異念斷斷見之人說  
一念斷皆墮二邊不會中道況佛去世後人根轉鈍

執名起諍互相是非悉墮邪見故龍樹破五陰一異  
同時前後皆如炎幻響化悉不可得寧更執於王數  
同時異時耶然界內外一切陰入皆由心起佛告毘  
丘一法攝一切法所謂心是論云一切世間中但有  
名與色若欲如實觀但當觀名色心是惑本其義如  
是若欲觀察須伐其根如灸病得穴今當去丈就尺  
去尺就十置色等四陰但觀識陰識陰者心是也○  
觀心具十法門一觀不可思議境二起慈悲心三巧  
安止觀四破法徧五識通塞六修道品七對治助開  
入知次位九能安忍十無法愛也既自達妙境卽起  
誓悲他次作行填願願行既巧破無不徧徧破之中

精識通塞令道品進行又用助開道道中之位已他  
皆識安忍內外榮辱莫著中道法愛故得疾入菩薩  
位譬如毗首羯磨造得勝堂不踈不密閒隙容綖巍  
巍品昂峙於上天非拙匠所能揆則又如善畫圖其  
臣郭寫像偈真骨法精靈生氣飛動豈填彩人所能  
繼綴此十重觀法橫豎收束微妙精巧初則簡境真  
僞中則正助相添後則安忍無著意圓法巧該括周  
備規矩初心將送行者到彼薩雲非闇證禪師誦文  
法師所能知也蓋由如來積劫之所勤求道場之所  
妙悟身子之所三請法譬之所三說正在茲乎一觀  
心是不可思議境者此境難說先明思議境令不思

議境易顯思議法者小乘亦說心生一切法謂六道  
因果三界輪環若去凡欣聖則棄下上出灰身滅智  
乃是有作四諦蓋思議法也太乘亦明心生一切法  
謂十法界也若觀心是有有善有惡惡則三品三途  
因果也善卽三品修羅人天因果觀此六品無常生  
滅能觀之心亦念念不住又能觀所觀悉是緣生緣  
生卽空並是二乘因果法也若觀此空有墮落二邊  
沈空滯有而起大慈悲入假化物實無身假作身實  
無空假說空而化導之卽菩薩因果法也觀此法能  
度所度皆是中道實相之法畢竟清淨誰善誰惡誰  
有誰無誰度誰不度一切法悉如是是佛因果法也

此之十法遷迤淺深皆從心出雖是大乘無量四諦  
所攝猶是思議之境非今止觀所觀也不可思議境  
者如華嚴云心如二畫師造種種五陰一切世間中  
莫不從心造種種五陰者如前十法界五陰也法界  
者三義十數是能依法界是所依能所合稱故言十  
法界又此十法各各因各各果不相混濫故言十法  
界又此十法一一當體皆是法界故言十法界云十  
法界通稱陰入界其實不同三途是有漏惡陰界入  
三善是有漏善陰界入二乘是無漏陰界入菩薩是  
亦有漏亦無漏陰界入佛是非有漏非無漏陰界入  
釋論云法無上者涅槃是卽非有漏非無漏法也無

量義經云佛無諸大陰界入者無前九陰界入也。言有者有涅槃常住陰界入也。大經云因滅無常色獲得常色受想行識亦復如是常樂重沓卽積聚。慈悲覆蓋卽陰義以十種陰界不同故故名五陰世間也。攬五陰通稱衆生衆生不同攬三途陰罪苦衆生攬人天陰受樂衆生攬無漏陰真聖衆生攬慈悲陰大士衆生攬常住陰尊極衆生。論云衆生無上者佛是豈與凡下同。大經云歌羅邏時名字異乃至老時名字異芽時名字異乃至果時名字亦異直約一期十時差別況十界衆生寧得不異故名衆生世間也。十種所居通稱國土世間者地獄依赤鐵住畜

生依地水空住修羅依海畔海底住人依地住天依  
宮殿住六度菩薩同人依地住通教菩薩惑未盡同  
人天依住斷惑盡者依方便土住別圓菩薩惑未盡  
者同人天方便等住斷惑盡者依實報土住如來依  
常寂光土住仁王經云三賢十聖住果報唯佛一人  
居淨土土土不同故名國土世間也此三十種世間  
悉從心造又十種五陰一一各具十法謂如是相性  
體力作因緣果報本末究竟等先總釋後隨類釋總  
釋者夫相以據外覽而可別釋論云易知故名爲相  
如水火相異則易可知如人面色具諸休否覽外相  
卽知其內昔孫劉相顯曹公相隱相者舉聲大哭四

海三分百姓荼毒若言有相闇者不知若言無相在者洞解當隨善相者信人面外具一切相也心亦如是具一切相衆生相隱彌勒相顯如來善知故遠近皆記不善觀者不信心具一切相當隨如實觀者信心具一切相也如是性者性以據內總有三義一不改名性無行經稱不動性性卽不改義也又性名性分種類之義分分不同各各不可改又性是實性實性卽理性極實無過卽佛性異名耳不動性扶空種性扶假實性扶中今明內性不可改如竹中火性雖不可見不得言無燧人乾草徧燒一切心亦如是具一切五陰性雖不可見不得言無以智眼觀具一切

性世間人可笑以其偏聞判圓經涅槃明佛知衆生  
有佛性判爲極常法華明佛知一切法如是性判爲  
無常豈可以少知爲常多知爲無常又法華云佛知  
一切法皆是一種一性此語亦少何故判爲無常又  
有師判法華十如前五如屬凡是權後五屬聖爲實  
依汝所判則凡無實永不得成聖聖無權非正偏知  
此乃專輒之說誣佛慢凡耳又涅槃明一切衆生悉  
有佛性而言是常淨名云一切衆生卽菩提相判是  
無常若佛性菩提相異者可一常一無常若不異者  
此判大謬如占者見王相王性俱得登極佛性菩提  
相何故不同如是體者主質故名體此十法界陰俱

用色心爲體質也如是力者堪任力用也如王力士  
千萬技能病故謂無病差有用心亦如是具有諸力  
煩惱病故不能運動如實觀之具一切力如是作者  
運爲建立名作若離心者更無所作故知心具一切  
作也如是因者招果爲因亦名爲業十法界業起自  
於心但使有心諸業具足故名如是因也如是緣者  
緣名緣由助業皆是緣義無明愛等能潤於業卽心  
爲緣也如是果者尅獲爲果習因習續於前習果尅  
獲於後故言如是果也如是報者酬因曰報習因習  
果通名爲因牽後世報此報酬於因也如是本末究  
竟等者相爲本報爲末本末悉從緣生緣生故空本

末皆空此就空爲等也又相但有字報亦但有字悉  
假施設此就假名爲等又本末互相表幟初相表  
後報觀後報知本相如見施知富見富知施初後相  
在此就假論等也又相無相無相而相非相非無相  
報無報無報而報非報非無報一一皆入如實之際  
此就中論等也二類解者束十法爲四類三途以表  
苦爲相定惡聚爲性摧折色心爲體登刀入鑊爲力  
起十不善爲作有漏惡業爲因愛取等爲緣惡習果  
爲果三惡趣爲報本末皆癡爲等三善表樂爲相定  
善聚爲性升出色心爲體樂受爲力起五戒十善爲  
作白業爲因善愛取爲緣善習果爲果人天有爲報

應就假名初後相在爲等也二乘表涅槃爲相解脫  
爲性五分爲體無繫爲力道品爲作無漏慧行爲因  
行行爲緣四果爲果既後有田中不生故無報云苦  
薩佛類者緣因爲相了因爲性正因爲體四弘爲力  
六度萬行爲作智慧莊嚴爲因福德莊嚴愛緣三菩  
提爲果大涅槃爲報云因緣有逆順順生死者有漏  
業爲因愛取等爲緣逆生死者以無漏正慧爲因行  
行爲緣俱損生破惑順界外生死亦以無漏慧爲因  
無明等爲緣若逆生死卽以中道慧爲因萬行爲緣  
俱損變易生死故因緣既爾餘者逆順準此可知若  
依聲聞但九無十若依大乘三佛義佛有報身若依

斷惑盡義則無後報九之與十斟酌可解衆生世間  
既是假名爲體分別攬實法假施設耳所謂惡道衆  
生相性體力究竟等云善道衆生相性體力究竟等  
無漏衆生相性體力究竟等菩薩佛法界相性體力  
究竟等準例皆可解國土世間亦具十種法所謂惡  
國土相性體力等云善國土無漏國土佛菩薩國土  
相性體力云夫一心具十法界一法界又具十法界  
百法界一界具三十種世間百法界卽具三千種世  
間此三千在一念心若無心而已介爾有心卽具三  
千亦不言一心在前一切法在後亦不言一切法在  
前一心在後例如八相遷物物在相前物不被遷相

在物前亦不被遷前亦不可後亦不可祇物論相遷  
祇相遷論物今心亦如是若從一心生一切法者此  
則是縱若心一時含一切法者此卽是橫縱亦不可  
橫亦不可祇心是一切法一切法是心故非縱非橫  
非一非異玄妙深絕非識所識非言所言所以稱爲  
不可思議境意在於此云問心起必託緣爲心具三  
千法爲緣具爲共具爲離具若心具者心起不用緣  
若緣具者緣具不關心若共具者未共各無共時安  
有若離具者旣離心離緣那忽心具四句尚不可得  
云何具三千法耶答地人云一切解惑真妄依持法  
性法性持真妄真妄依法性也攝大乘云法性不爲

惑所染不爲真所淨故法性非依持言依持者阿黎耶是也無沒無明盛持一切種子若從地師則心具一切法若從攝師則緣具一切法此兩師各據一邊若法性生一切法者法性非心非緣非心故而心生一切法者非緣故亦應緣生一切法何得獨言法性是真妄依持耶若言法性非依持黎耶是依持離法性外別有黎耶依持則不關法性若法性不離黎耶黎耶依持卽是法性依持何得獨言黎耶是依持又違經經言非內非外亦非中閒亦不常自有又違龍樹龍樹云諸法不自生亦不從他生不共不無因更就譬檢爲當依心故有夢依眼故有夢眠法合心故

有夢離心離眠故有夢若依心有夢者不眠亦有夢  
若依眠有夢者死人如眠應有夢若眠心兩合而有  
夢者眠人那有不夢時又眠心各有夢合可有夢各  
既無夢合不應有若離心離眠而有夢者虛空離二  
應常有夢四句求夢尚不得云何於眠夢見一切事  
心喻法性夢喻黎耶云何偏據法性黎耶生一切法  
當知四句求心不可得求三千法亦不可得既橫從  
四句生三千法不可得者應從一念心滅生三千法  
耶心滅尚不能生一法云何能生三千法耶若從心  
亦滅亦不滅生三千法者亦滅亦不滅其性相違猶  
如水火二俱不立云何能生三千法耶若謂心非滅

非不滅生三千法者非滅非不滅非能非所云何能  
所生三千法耶亦縱亦橫求三千法不可得非縱非  
橫求三千法亦不可得言語道斷心行處滅故名不  
可思議境大經云生生不可說生不生不可說不生  
生不可說不生不生不可說卽此義也當知第一義  
中一法不可得況三千法世諦中一心尚具無量法  
況三千耶如佛告德女無明內有不不也外有不不  
也內外有不不也非內非外有不不也佛言如有  
龍樹云不自不他不共不無因生大經生生不可說  
乃至不生不生不可說有因緣故亦可得說謂四悉  
檀因緣也雖四句冥寂慈悲憐愍於無名相中假名

相說或作世界說心具一切法聞者歡喜如言五界  
無別法唯是一心造卽其文也或說緣生一切法聞  
者歡喜如言五欲令人墮惡道善知識者是太因緣  
所謂化導今得見佛卽其文也或言因緣共生一切  
法聞者歡喜如言水銀和真金能塗諸色像卽其文  
也或言離生一切法聞者歡喜如言十二因緣非佛  
作非天人修羅作其性自爾卽其文也此四句卽世  
界悉檀說心生三千一切法也云何爲人悉檀如言  
佛法如海唯信能入信則道源功德母一切善法由  
之生汝但發三菩提心是則出家禁戒具足聞者生  
信卽其文也或說緣生一切法如言若不值佛當於

無量劫墮地獄苦以見佛故得無根信如從伊蘭出生旃檀聞者生信或說合生一切法如言心水澄清珠相自現慈善根力見如此事聞者生信卽其文也或說離生一切法如言非內觀得是智慧乃至非內外觀得是智慧若有住著先尼梵志小信尚不可得況捨邪入正聞者生信卽其文也是爲爲人悉檀四句說心生三千一切法也云何對治悉檀說心治一切惡如言得一心者萬邪滅矣卽其文也或說緣治一切惡如說得聞無上大慧明心定如地不可動卽其文也或說因緣和合治一切惡如言一分從思生一分從師得卽其文也或說離治一切惡我坐道場

時不得一切法空拳誑小兒誘度於一切卽其文也  
是爲對治悉檀心破一切惡云何第一義悉檀心得  
見理如言心開意解豁然得道或說緣能見理如  
須臾聞之卽得究竟三菩提或說因緣和合得道如  
快馬見鞭影卽得正路或說離能見理如言無所得  
卽是得已是得無所得是名第一義四句見理何況  
心生二千法耶佛言盡淨不在因緣共離卽世諦是  
第一義也又四句俱皆可說說因亦是緣亦是共亦  
是離亦是若爲盲人說乳若貝若旃若雲若鶴盲聞  
諸說卽得解乳卽世諦是第一義諦當知終日說終  
日不說終日不說終日說終日雙遮終日雙照卽破

卽立卽立卽破經論皆爾天親龍樹內鑒冷然外適  
時宜各權所據而人師偏解學者苟執遂與矢石各  
保一邊大乖聖道也若得此意俱不可說俱可說若  
隨便宜者應言無明法法性生一切法如眠法法心  
則有一切夢事心與緣合則三種世間三千相性皆  
從心起一性雖少而不無無明雖多而不有何者指  
一爲多多非多指多爲一一非少故名此心爲不思  
議境也若解一心一切心一切心一心非一非一切  
一陰一切陰一切陰一陰非一非一切一入一切入  
一切入一入非一非一切一界一切界一切界一界  
非一非一切一衆生一切衆生一切衆生一衆生非

一非一切一國土一切國土一切國土一國土非一  
非一切一相一切相一切相一相非一非一切乃至  
一究竟一切究竟一切究竟一究竟非一非一切徧  
歷一切皆是不可思議境若法性無明合有一切法  
陰界入等卽是俗諦一切界入是一法界卽是真諦  
非一非一切卽是中道第一義諦如是徧歷一切法  
無非不思議三諦云若一法一切法卽是因緣所生  
法是爲假名假觀也若一切法卽一法我說卽是空  
空觀也若非一非一切者卽是中道觀一空一切空  
無假中而不空總空觀也一假一切假無空中而不  
假總假觀也一中一切中無空假而不中總中觀也

卽中論所說不可思議一心三觀歷一切法亦如是  
若因緣所生一切法者卽方便隨情道種權智若一  
切法一法我說卽是空卽隨智一切智若非一非一  
切亦名 **道義者**卽非權非實一切種智例上一權  
一切權一實一切實一切非權非實徧歷一切是不  
思議三智也若隨情卽隨他意語若隨智卽隨自意  
語若非權非實卽非自非他意語徧歷一切法無非  
漸頓不定不思議教門也若解頓卽解心心尚不可  
得云何當有趣非趣若解漸卽解一切法趣心若解  
不定卽解是趣不過此等名異義同軌則行人呼爲  
三法所照爲三諦所發爲三觀觀成爲三智教他呼

爲三語歸宗呼爲三趣得斯意類一切皆成法門種種味勿嫌煩云如如意珠天上勝寶狀如芥粟有大功能淨妙五欲七寶琳琅非內畜非外入不謀前後不擇多少不作麤妙稱意豐儉降雨穰穰不添不盡蓋是色法尚能如此況心神靈妙寧不具一切法耶又三毒惑心一念心起尚復身邊利鈍八十八使乃至八萬四千煩惱若言先有那忽待緣若言本無緣對卽應不有不無定有卽邪定無卽妄當知有而有不有而有惑心尚爾況不思議一心耶又如眠夢見百千萬事豁寤無一況復百千未眠不夢不覺不多不一眠力故謂多覺力故謂少莊周夢爲蝴蝶翾

翔百年寤知非蝶亦非積歲無明法法性一心一切  
心如彼昏眠達無明卽法性一切心一心如彼醒寤  
云又行安樂行人一眠夢初發心乃至作佛坐道場  
轉法輪度衆生入涅槃豁寤祇是一夢事若信三喻  
則信一心非口所宣非情所測此不思議境何法不  
收此境發智何智不發依此境發誓乃至無法愛何  
誓不具何行不滿足耶說時如上次第行時一心中  
具一切心云○二發真正菩提心者旣深識不思議  
境知一苦一切苦自悲昔苦起惑耽湎麁弊色聲縱  
身口意作不善業輪環惡趣榮諸熱惱身苦心苦而  
自毀傷而今還以愛繭自纏癡燈所害百千萬劫一

何痛哉設使欲捨三途欣五戒十善相心修福如市  
易博換翻更益罪似魚入筍口蛾赴燈中狂計邪黠  
逾迷逾遠渴更飲鹹龍須縛身入水轉痛牛皮繫體  
向日彌堅盲入棘林溺墮洄復把刃抱炬痛那可言  
虎尾蛇頭悚焉悼慄自惟若此悲他亦然假令隘路  
叛出怨國備歷辛苦絕而復蘇往至貧里傭賃一日  
止宿草菴不肯前進樂爲鄙事不信不識可悲可怪  
思惟彼我鯁痛自他卽起大悲興兩誓願衆生無邊  
誓願度煩惱無數誓願斷衆生雖如虛空誓度如空  
之衆生雖知煩惱無所有誓斷無所有之煩惱雖知  
衆生數甚多而度甚多之衆生雖知煩惱無邊底而

斷無底之煩惱雖知衆生如如佛如而度如佛如之  
衆生雖知煩惱如實相而斷如實相之煩惱何者若  
但拔苦因不拔苦果此誓雜毒故須觀空若偏觀空  
則不見衆生可度是名著空者諸佛所不化若偏見  
衆生可度卽墮愛見大悲非解脫道云今則非毒非  
僞故名爲真非空邊非有邊故名爲正如鳥飛空終  
不住空雖不住空跡不可尋雖空而度雖度而空是  
故名誓與虛空共闢故名真正發菩提心卽此意也  
又識不可思議心一樂心一切樂心我及衆生皆雖  
求樂不知樂因如執瓦礫謂如意珠妄指螢光呼爲  
日月今方始解故起大慈興兩誓願謂法門無量誓

願知無上佛道誓願成雖知法門永寂如空誓願修行永寂雖知菩提無所有無所有中吾故求之雖知法門如空無所有誓願畫續莊嚴虛空雖知佛道非成所成如虛空中種樹使得花得果雖知法門及佛果非修非不修而修非證非得得無所證得而證而得是名非僞非毒名爲真非空非見愛名爲正

摩訶止觀卷第五上

摩訶止觀卷第五中

天台智者大師說

如此慈悲誓願與不可思議境智非前非後同時俱起慈悲卽智慧智慧卽慈悲無緣無念普覆一切任運拔苦自然與樂不同毒害不同但空不同愛見是名真正發心菩提義自悲已悲衆生義皆如上說觀心可解○三善巧安心者善以止觀安於法性也上深達不思議境淵奧微密博運慈悲亘蓋若此須行填願行卽止觀也無明癡惑本是法性以癡迷故法性變作無明起諸顛倒善不善等如寒來結水變作堅冰又如眠來變心有種種夢今當體諸顛倒卽是

法性不一不異雖顛倒起滅如旋火輪不信顛倒起滅唯信此心但是法性起是法性起滅是法性滅體其實不起滅妄謂起滅祇指妄想悉是法性以法性繫法性以法性念法性常是法性無不法性時體達既成不得妄想亦不得法性還源反本法界俱寂是名爲止如此止時上來一切流轉皆止觀者觀察無明之心上等於法性本來皆空下等一切妄想善惡皆如虛空無二無別譬如劫盡從地上至初禪炎炎無非是火又如虛空藏菩薩所現之相一切皆空如海慧初來所現一切皆水介爾念起所念念者無不卽空空亦不可得如前火木能使薪然亦復自然法

界洞朗咸皆大明名之爲觀止祇是智智祇是止不動止祇是不動智不動智祇是不動止不動智照於法性卽是觀智得安亦是止安不動於法性相應卽是止安亦是觀安無二無別若俱不得安當復云何夫心神冥昧攖利怵怖汨起汨滅難可執持倏去倏來不易關禁雖復止之馳疾颺炎雖復觀之闇逾漆墨加功苦至散惑倍隆敵強力弱鵲蚌相扼旣不得進又不可退當殉命奉道薦以肌骨誓巧安心方便廻轉令得相應成觀行位也安心爲兩一教他二自行教他又爲兩一聖師二凡師聖師有慧眼力明於法藥有法眼力識於病障有化道力應病授藥令得

服行如翹多知弟子應以信悟令上樹應以食悟令服乳酪應以呵貴悟化爲女像一一開曉無有毫差不待時不過時言發卽悟佛去世後如是之師甚爲難得盲龜何由上值浮孔墜芥豈得下貫針鋒難難二者凡師雖無三力亦得施化譬如良醫精別藥病解色解聲解脈逗藥卽差有命盡者亦不能起死若不解脈醫問病相依語作方亦挑脫得差身子聖德亦復差機凡夫具縛稱病導師今不論聖師正說凡師教他安心也他有二種一信行二法行薩婆多明此二人位在見道因聞入者是爲信行因思入者是爲法行曇無德云位在方便自見法少憑聞力多後

時要須聞法得悟名爲信行憑聞力少自見法多後  
時要須思惟得悟名爲法行若見道中無相心利一  
發卽真那得判信法之別然數據行成論據根性各  
有所以不得相非今師遠討源由久劫聽學久劫坐  
禪得爲信法種子世世熏習則成根性各於聞思開  
悟耳若論根利鈍者法行利內自觀法故信行鈍藉  
他聞故又信行利一聞卽悟故法行鈍歷法觀察故  
或俱利俱鈍信行人聞慧利修慧鈍法行人修慧利  
聞慧鈍已說前人根性利鈍竟云何安心師應問言  
汝於定慧爲志何等其人若言我聞佛說善知識者  
如月形光漸漸圓著又如梯登漸漸增高巧說轉人

心得道全因緣志欣渴飲如犢逐母當知是則信行人也若言我聞佛說明鏡體若不動色像分明淨水無波魚石自現欣捨惡覺如棄重擔當知是則法行人也既知根性於一人所八番安心咄善男子無量劫來飲狂散毒馳逐五塵升沈三界猶如猛風吹兜羅毬大熱沸鑊煮豆升沈從苦至惱從惱至苦何不息心達本以一其意意若一者何事不辦苦集得一則不輪迴無明得一不至於行乃至不至老死摧折大樹畢故不造新六蔽得一則度彼岸唯此爲快善巧方便種種因緣種種譬喻廣讚於止發悅其情是名隨樂欲以止安心也又善男子如天亢旱河池悉

乾萬卉焦枯百穀零落娑伽羅龍王七日構雲四方  
注雨大地沾洽一切種子皆萌芽一切根株皆開發  
一切枝葉皆蔚茂一切花果皆敷榮人亦如是以散  
逸故應生善不復生已生善還退失禪定河乾道品  
樹滅萬善焦枯百福殘悴因花道果不復成熟若能  
閑林一意內不出外不入靜雲興也發諸禪定卽是  
降雨也功德叢林燻頂方便眼智明覺信忍順忍無  
生寂滅乃至無上菩提悉皆克獲善巧方便種種緣  
喻廣讚於止生其善根是名隨便宜以止安心也又  
善男子夫散心者惡中之惡如無鉤醉象踏壞花池  
尤鼻駱駝翻倒負馱疾於掣電毒逾蛇舌重沓五翳

埃靄曜靈睫近霄遠俱皆不見若能修定如密室中  
燈能破巨闇金錚決膜空色朗然一指二指三指皆  
了大雨能淹囂塵大定能靜狂逸止能破散虛妄滅  
矣善巧方便種種緣喻廣讚於止破其睡散是名對  
治以止安心也又善男子心若在定能知世間生滅  
法相亦知出世不生不滅法相如來成道猶尚樂定  
況諸凡夫有禪定者如夜見電光卽得見道破無數  
億洞然之惡乃至得成一切種智善巧方便種種緣  
喻廣讚於止卽會真如是名隨第一義以止安心也  
其人若言我聞寂滅都不入懷若聞分別聽受無厭  
卽應爲說三惡燒然駝驢重楚餓鬼飢渴不名爲苦

癡闇無聞不識方隅乃是大苦多聞分別樂見法法  
喜樂以善攻惡樂無著阿羅漢是名爲最樂從多聞  
人間甘露樂如教觀察知道非道遠離坑坎直去不  
迴善巧方便種種緣喻廣讚於觀發悅其情是名隨  
樂欲以觀安心又善男子月開蓮華日興作務商應  
隨王彩畫須膠垸不遇火無須臾用言不得導一步  
不前行無觀智亦復如是一切種智以觀爲根本無  
量功德之所莊嚴善巧方便種種緣喻廣讚於觀生  
其功德是名隨便宜以觀安心又善男子智者識怨  
怨不能害武將有謀能破強敵非風何以卷雲非雲  
何以遮熱非水何以滅火非火何以除闇析薪之斧

解縛之刀豈過智慧善巧方便種種緣喻廣讚於觀  
使其破惡是名對治以觀安心又善男子井中七寶  
閻室瓶盆要待日明日既出已將得明了須智慧眼  
觀知諸法實相一切諸法中皆以等觀入般若波羅  
蜜最爲照明善巧方便種種緣喻廣讚於觀令得悟  
解是名第一義以觀安心如是八番爲信行人說安  
心也其人若云我樂息心默已復默損之又損之遂  
至於無爲不樂分別坐馳無益此則法行根性當爲  
說止汝勿外尋但內守一攀覺流動皆從妄生如旋  
火輪輟手則息洪波鼓怒風靜則澄淨名云何謂攀  
緣謂緣三界何謂息攀緣謂心無所得瑞應云其得一

心者則萬邪滅矣龍樹云實法不顛倒念想觀已除  
言語法皆滅無量衆罪除清淨心常一如是尊妙人  
則能見般若夫山中幽寂神仙所讚況涅槃澄淨賢  
聖尊崇佛話經云比丘在聚身口精勤諸佛咸憂比  
丘在山息事安臥諸佛皆喜況復結跏束手緘脣結  
舌思惟寂相心源一止法界同寂豈非要道唯此爲  
貴餘不能及善巧方便種種因緣種種譬喻廣讚於  
止發悅其心是名隨樂欲以止安心其人若云我觀  
法相祇增紛動善法不明當爲說止止是法界平正  
良田何法不備止捨攀緣卽是檀止體非惡卽是戒  
止體不動卽是忍止無間雜卽是精進止則決定卽

是禪止法亦無止者亦無卽是慧因止會非止非有  
止卽是方便一止一切止卽是願止止愛止止見卽  
是力此止如佛止無二無別卽是智止具一切法卽  
是祕藏但安於止何用別修諸法善巧方便種種緣  
喻令生善根卽是隨便宜以止安心也若言我觀法  
相散睡不除者當爲說止大有功能止是譬定八風  
惡覺所不能入止是淨水蕩於貪婬八倒猶如朝露  
見陽則晞止是大慈愍親俱愍能破恚怒止是大明  
呪癡疑皆遣止卽是佛破除障道如阿伽陀藥徧治  
一切如妙良醫呪枯起死善巧方便種種緣喻令其  
破惡是名對治以止安心其人若言我觀察時不得

開悟當爲說止止卽體真照而常寂止卽隨緣寂而常照止卽不止止雙遮雙照止卽佛母止卽佛父亦卽父卽母止卽佛師佛身佛眼佛之相好佛藏佛住處何所不具何所不除善巧方便種種緣喻廣讚於止是爲第一義以止安心彼人若言止狀沈寂非我悅樂當爲說觀推尋道理七覺中有擇覺分八正中  
有正見六度中有般若於法門中爲主爲導乃至成佛正覺大覺徧覺皆是觀慧異名當知觀慧最爲尊妙如是廣讚是爲隨樂欲以觀安心若勤修觀能生信戒定慧解脫解脫知見知病識藥化道大行衆善普會莫復過觀是爲隨便宜以觀安心觀能破闇能

照道能除慙能得寶傾邪山竭愛海皆觀之力是爲  
隨對治以觀安心觀觀法時不得能所心慮虛豁騰  
騰欲開但當勤觀開示悟入是爲用第一義以觀安  
心是爲入番爲法行人說安心也復次人根不定或  
時迴轉薩婆多明轉鈍爲利成論明數習則利此乃  
始終論利鈍不得一時辨也今明衆生心行不定或  
須臾而鈍須臾而利任運自爾非關根轉亦不數習  
或作觀不徹因聽卽悟或久聽不解暫思卽決是故  
更論轉根安心若法行轉爲信行逐其根轉用八番  
悉檀而授安心若信行轉成法行亦逐根轉用八番  
悉檀而授安心得此意廣略自在說之轉不轉合有

三十二安心也自行安心者當觀察此心欲何所樂若欲息妄令念想寂然是樂法行若樂聽聞徹無明底是樂信行樂寂者知妄從心出息心則衆妄皆靜若欲照知須知心原心原不二則一切諸法皆同虛空是爲隨樂欲自行安心其心雖廣分別心及諸法而信念精進毫善不生卽當凝停莫動諸善功德因靜而生若凝停時遠更沈寂都無進忍當校計籌量策之令起若念念不住如汗馬奔逸卽當以止對治馳蕩若靜默無記與睡相應卽當修觀破諸昏塞修止旣久不能開發卽應修觀觀一切法無礙無異怙怙明利漸覺如空修觀若久闇障不除宜更修止止

諸緣愈無能無所所我皆寂空慧將生是爲自修  
行八番善巧布厝令得心安云信行安心者或欲  
寂定如須彌不畏八動卽應聽止欲聞利觀破諸煩  
惱如日除闇卽應聽觀聽觀多如日焦茅卽應聽止  
潤以定水或聽定淹久如茅爛不生卽應聽觀令風  
自發動使善法現前或時馳覺一念叵住卽應聽止  
以治散心或沈昏濛濛坐霧卽當聽觀破此睡熟或  
聽此豁豁卽專聽止或聞觀朗朗卽專聽觀是爲自  
修信行八番巧安心也若法行心轉爲信行信行心  
轉爲法行皆隨其所宜巧鑽研之自行有三十二化  
他亦三十二合爲六十四安心也復次信法不孤立

須聞思相資如法行者隨聞一句體寂湛然夢妄皆  
遣還坐思惟心生歡喜又聞止已還更思惟卽生禪  
定又聞於止還卽思惟妄念皆破又聞止已還更思  
惟朗然欲悟又聞觀已還更思惟心大歡喜又聞觀  
已還更思惟生善破惡欲悟等準前可知此乃聽少  
思多名爲法行非都不聽法也信行端坐思惟寂滅  
欣踊未生起已聞止歡喜甘樂端坐念善善不能發  
起已聞止信戒精進倍更增多端坐治惡惡不能遣  
起已聞止散動破滅端坐卽真真道不啓起已聞止  
豁如悟寂是爲信行坐少聞多非都不思惟前作一  
向根性今作相資根性就相資中復論轉不轉亦有

三十二安心化他相資亦有三十二安心合六十四  
合前爲一百二十八安心也夫心地難安違苦順樂  
今隨其所願逐而安之譬如養生或飲或食適身立  
命養法身亦爾以止爲飲以觀爲食藥法亦兩或九  
或散以除冷熱治無明病以止爲九以觀爲散如陰  
陽法陽則風日陰則雲雨雨多則爛日多則焦陰如  
定陽如慧慧定偏者皆不見佛性八番調和貴在得  
意一種禪師不許作觀唯專用止引偈云思思徒自  
思思思徒自苦息思卽是道有思終不觀又一禪師  
不許作止專在於觀引偈云止止徒自止昏闇無所  
以止止卽是道觀觀得會理兩師各從一門而入以

已益教他學者則不見意一向服乳漿猶難得泥復  
醍醐若一向作解者佛何故種種說耶天不常晴醫  
不專散食不恒飯世間尚不爾況出世耶今隨根隨  
病迴轉自行化他有六十四若就三番止觀則三百  
八十四又一心止觀復有六十四合五百一十二三  
悉檀是世間安心世醫所治差已復生一悉檀是出  
世安心如來所治畢竟不發世出世法互相成顯若  
離三諦無安心處若離止觀無安心法若心安於諦  
一句卽足如其不安巧用方便令心得安一目之羅  
不能得鳥得鳥者羅之一目耳衆生心行各各不同  
或多人同一心行或一人多種心行如爲一人衆多

亦然如爲多人一人亦然須廣施法網之目捕心行之鳥耳○第四明破法徧者法性清淨不合不散言語道斷心行處滅非破非不破何故言破但衆生多顛倒少不顛倒破顛倒令不顛倒故言破法徧耳上善巧安心則定慧開發不俟更破若未相應應用有定之慧而盡淨之故言破耳然破法須依門經說門不同或文字爲門大品明四十二字門是也或觀行爲門釋論明菩薩修三三昧緣諸法實相是也或智慧爲門法華云其智慧門是也或理爲門大品明無生法無來無去卽是佛也依教門通觀依觀門通智依智門通理理爲門復通何處教觀智等諸門悉依

於理能依是門所依何得非門雖無所通究竟徧通  
是妙門也三門置之今但說教門三藏四門先破見  
後破思亦俱破云通教四門亦先破見後破思亦俱  
破但破四住不得言徧也別教四門次第斷五住斯  
乃豎徧橫不徧並非今所用今不思議一境一切境  
一心一切心橫豎諸法悉趣於心破心故一切皆破  
故言徧也餘門破不徧則不須說圓教四門皆能破  
徧所謂有門無門亦有亦無門非有非無門今且置  
三門且依空無生門無生門能通止觀到因到果又  
能顯無生使門光揚何者止觀是行無生門是教依  
教修行通至無生法忍因位具足淨名三十二菩薩

各說入不二門皆是菩薩從門入位而無生爲首  
品明阿字門所謂諸法初不生此證無生門通止觀  
到因其義可見止觀光揚無生門者法不自顯弘之  
在人人能行行法門光顯使無生教縱橫無礙觸處  
皆通門義方成譬如世人門戶出入有人有位門則  
榮顯能譬既然所譬可解門通果者大經云般涅槃言  
不槃者言生不生之義名大涅槃又云定慧二法能  
大利益乃至菩提大品云無生法無來無去無生法  
卽是佛法華云佛自任大乘如其所得法定慧力莊  
嚴以此度衆生且引三經果義明矣止觀能顯果者  
果不自顯由行故果滿果滿故一切皆滿巍巍堂堂

如星中月照十寶山影臨四海果亦如是無上無上  
功高十地汲引四機金光明中佛禮骨塔卽其義也  
無生教門豎攝因果其義已彰橫攝之意今當說大  
品云若聞無生門則解一切義初阿字攝四十一字  
四十一字攝阿字中間亦然橫豎備攝其文如此此  
意難見更引佛藏示其相次引涅槃釋其義後說無  
生門破法徧佛藏云劫火起時菩薩一唾火卽滅一  
吹世界卽成非是先滅後成祇一唾中卽滅卽成彼  
經明外用內合無生門卽破徧卽立徧破立不須二  
念若內無是德則外無大用寄外顯內其相如是須  
識觀心者衆生一期將訖卽是劫盡三毒三災火爲

語端以止止之如唾滅以觀觀之如吹成云大經釋  
義者不聞聞一句有種種義初云不生生不生不生  
生不生生生按此四句說無生門攝自行因果化他  
能所等法皆徧不生生者安住世諦初出胎時名不  
生生今解世諦者無明共法性出生一切隔歷分別  
故名世諦安住者以止觀安於世諦卽是不可思議  
境觀行位成故名安住以安住故名託聖胎初開佛  
知見得無生忍名出聖胎不見無明世諦故言不生  
獲佛知佛見故名爲生論云諸法不生而般若生卽  
其義也此說自行無生忍位因義成也經釋不生不  
生者不生不生名大涅槃生相盡故修道得故今解

果由因尅故言修道得故斷德已圓無明不生智德  
已圓般若不生故言不生不生此說自行寂滅忍果  
義成也因果既圓卽如佛藏所明一吹唾卽滅卽立  
是其義焉經釋生不生者世諦死時名生不生今解  
世諦者無明是其根本既破無明故言世死世死故  
名生不生此釋初句初句上緣於理智德成故言不  
生生此句下破於惑斷德成故言生不生不生名雖  
同事理大異初句詔智慧開發爲生此句詔結業起  
動爲生生名雖同而縛脫大異莫迷名惑言須精識  
之須精識之初句如唾中吹此句如吹中唾唾吹一  
時不可前後也經重釋此句云四任菩薩名生不生

生自在故今解先生不生說自行之惑滅重釋生不生明化道之興何者菩薩斷四住時破結業生卽能自在生況斷五住耶以劣顯勝彌彰化道二乘斷惑沈空不能如此故標菩薩也惑滅顯唾化興顯吹塵經釋生生者一切有漏念念生故今解此句明化用之所耳菩薩何意不生而生良由一切有漏衆生相續不斷是故菩薩而起大悲示自在生而度脫之是爲無生門攝自行因果化他能所皆悉具足矣四住菩薩者地持云從初發心住至十地東爲六住一種性住二解行住三淨心住四行道迹住五決定住六究竟住種性住者若人無有種性雖生善道數退數

進不得在菩薩六人數中若種性處成就無有退失  
數數增進得是一人也解行人是初地方便淨心住  
是入初地得出世間心離凡夫我相障故名淨心住  
行道迹住者從二地至七地住修道也決定住者八  
地九地也已得報行不退故名決定究竟住者  
第十地學行窮滿故言究竟住也經稱四住名生不  
生者正是行道迹住從二地上正是入假化他之位  
處處現生而非實生將別顯圓初出胎時卽能利他  
化生自在於圓義亦應無失經又六句不生生亦不  
可說生生亦不可說生不生亦不可說不生不生亦  
不可說生亦不可說不生亦不可說按此六句明無

生門破法徧若破思議惑用前四句若破不思議惑用後二句何者思議惑雖多不出界內外界外惑附體生故言不生生界內惑是枝末故言生生此惑紛綸並是所化之境爲此境故施自在生所化旣不可得何處有能化能所俱亡是故不生生生生俱不可說若破思議解此解雖多不出界內外界內解止遣分段故言生不生界外解雙遣分段變易故言不生不生此解淺深故有種種自行因果理尚非一寧有種種今徧唾破故言生不生不可說不生亦不可說若破不可思議惑者祇是無明無明故生生故無明無明不可得生亦不可得今皆唾破故言生不

可得若破不思議解者祇是圓解圓解始終判出因果理不偏圓亦非始終那有因果今皆唾破故言不生不可得將彼經意釋無生門破法徧者其義分明佛自釋六句云何不生生不可說不生名爲生故不可說今解不生者法性也生者無明也二乘證不生猶受法性生故言不生名爲生依佛此言知是界外附體之惑不生而名爲生生卽顛倒顛倒卽不顛倒心行處滅言語道斷故不可說云何生生不可說生生故生生故不生故不可說今解生生故生者卽是大生生小生八相所遷有漏之法也依佛此言知是界內有漏惑也生生故不生者因緣生法卽空卽

中心行處滅言語道斷故不可說也云何生不生不可說生卽名爲生生不自生故不可說今解生卽名爲生者乃是諸法不生般若生也生不自生者此般若生不從四句生生不自生是初句耳具言生不他生生不共生生不無因生又般若生時世諦已死無復有生而生三界者爲緣故生非業生也故言生不自生若般若生若自在生皆言語道斷故不可說也據此意知是界內之解也云何不生不生不可說以修道得故今解修道得者乃是極果所證尚非下十地所知豈可言說據此知是界外之解也經云生亦不可說以生無故今解此破不思議惑界內生生亦

是生界外不生。生亦是生。祇是無明之生生。必託緣生。緣生卽空。卽中心行處滅。言語道斷。故不可說也。經云不生不可說。以有得故。今解此破不思議解。及界內之解。亦是修道得。故界外之解。亦是修道得。故得卽詣理。理絕心口。故不可說也。佛以六句破諸法解惑。皆言不可說。彌顯無生門。破法徧也。依佛藏經前四句。亦吹亦唾。後兩句。結前吹唾耳。此六句專論於唾也。又楞伽云。我從得道。夜至涅槃。夜不說一字。佛因二法。作如此說。謂緣自法及本住法。自法者。彼如來所得。我亦得之。無增無減。離言說妄想文字。二趣釋曰。緣自法是證聖真諦實性也。離言說妄想者。

不可思議也離文字者離假名也離二趣者離說所  
說想所想名所名也本住法者謂古先聖道法界常  
住如道趣城道爲人行非行者作道城由道至非至  
者作城經曰士夫見平坦道卽隨入城受如意樂我  
及先佛法界常住亦復如是是故二夜不說一字當  
知二法決定非口言分別所能變異本法者如理也  
自法者證實此義與大經四不可說意同生生不可  
說者本法不可說也生隨順緣生本法不可說也生  
不生不可說者卽自斷法不可說也不生生不可說  
者卽自智法不可說也不生不生不可說者卽是究  
竟自證法不可說也後二句一結生不可說結本法

不可說也一句結不生不可說結自證法不可說也  
大經云十因緣法爲生作因亦可得說者今解此卽  
無生門徧立之義亦如佛藏徧吹卽成也十因緣者  
從無明支乃至有支立諸法也立有三義一立衆生  
二立機緣三立聲教立衆生者過去二因現在五果  
更互因緣而立五陰假名衆生也立根機者過去或  
修行析行體行漸行頓行以行爲業無明潤之致今  
五果於此陰果更起本習或起析愛取有或起體愛  
取有或起漸愛取有或起頓愛取有取有起故得爲  
機緣也立聲教者析愛取有起故感三藏教是爲生  
生不可說十因緣法爲生生作因亦可得說說生生

也體愛取有感於通教是爲生不生不可說十因緣  
法爲生不生作因亦可得說說生不生也漸愛取有  
感於別教是爲生生不可說十因緣法爲生生  
作因亦可得說說生生也頓愛取有感於圓教是  
爲不生不生不可說十因緣法爲不生不生作因亦  
可得說說不生不生也衆生若立一切惑法因果立  
一切所化立機教若立一切解行因果立一切能化  
立是爲無生門一立一切立故大品云若聞阿字門  
則解一切義佛藏云一吹一切悉成此之謂也如地  
持四種成熟謂聲聞種性緣覺種性佛種性菩薩種  
性無此四性以善趣熟之佛種性卽此圓機菩薩種

性卽此別機彼文云菩薩種子有佛無佛堪能次第  
斷煩惱障及智障豈非別機聲聞種性當開之別異  
善根卽三藏機退大取小種性卽通機彼四成熟卽  
此四種機緣義也問上六句是無生門一破一切破  
十因緣法是無生門一立一切立上四句是無生門  
亦破亦立亦應有第四句非破非立不荅大經十九  
卷初云十事功德不可思議聞者驚怪非難非易非  
內非外非相非非相非方非圓非尖非斜等卽是第  
四句非破非立之文義問若無生門攝一切法者則  
無復諸門也荅無生門亦攝諸門諸門亦攝無生門  
欲依智德義便故言無生門此應四句生門無生門

亦生亦無生門非生非無生門一一門各有四門四  
四十六門若依斷德義便應有滅門不滅門亦滅亦  
不滅門非滅非不滅門一一門各有四門四四十六  
門合三十二門大經舉十五日月光增正喻智德十  
六日月光滅正喻斷德月無增無滅約白論增約黑  
論滅實相無智無斷約照論智約寂論斷若無生門  
攝一切法高極此豎攝一切法也若無生門攝諸法  
廣徧者卽無生門橫攝一切法也問無生門門稱無  
生其境惑智斷等悉應稱爲無生那忽言無生生生  
生自在故荅此還助顯無生門無生忍發故言無  
生生明其所化故言生生明其應用故言生自在還

是無生門卽唾故言無生卽吹故言無生生等彌顯  
無生門攝法徧耳約大經釋門義竟云

摩訶止觀卷第五中

摩訶止觀卷第五下

天台智者大師說

○次明破法徧者爲三一無生門從始至終盡其源底豎破法徧二歷諸法門當門從始至終盡其源底橫破法徧三橫豎不二從始至終盡其源底非橫非豎破法徧豎則論高橫則論廣豎來入橫無橫而不高橫來入豎無豎而不廣法華云其車高廣橫豎不二則非橫非豎故云是法平等無有高下一無生門破法徧者又爲三一從假入空破法徧二從空入假破法徧三兩觀爲方便得入中道第一義諦破法徧如此三觀實在一心法妙難解寄三以顯一耳大論

云三智實在一心爲向人說令易解故分屬三人義  
嚴亦有二意宣說菩薩歷劫修行彼爲鈍根也初發  
心時便成正覺所有慧身不由他悟彼是利根也法  
華唯一意正直捨方便但說無上道今欲借別顯總  
舉次而論不次故先三義解釋也從假入空破法徧  
又爲三先從見假入空次從思假入空後四門料簡  
從見假入空又爲二先明見假次明空觀見惑附體  
而生還能障體如炎依空而動亂於空似夢因眠夢  
昏於眠夢若不息眠不得覺此惑不除體不得顯然  
見則見理見實非惑見理時能斷此惑從解得名名  
爲見惑耳見惑有四一單四見二複四見三具足四

見四無言見單四見者執有執無執亦有亦無執非  
有非無於一有見復起利鈍謂有於我我與有俱恒  
起我心與我相應卽是我見以計我故能生邊見以  
我邊故破世出世因果卽是邪見執此爲道  
槃名爲戒取謂此爲實餘皆妄語不受餘見名爲見  
取是已法者愛非已法故瞋我解他不解生慢不識  
有見中苦集爲癡猶豫不決爲疑如是十使歷欲界  
四諦苦下具十集下有七除身邊戒取道下有八除  
身邊滅下有七除身邊戒取合三十二使歷色界四  
諦有二十八無色亦爾例除一瞋合有八十八使餘  
三見亦各具八十八使若歷六十二見見見各具八

十八使倒浪瀾漫不可稱數邪網彌密障於體理五十校計經云若眼見好色中有陰有集見好色中有陰有集見平平色中有陰有集乃至意緣法亦如是一根有三三中有六六根具三十六三世合百八歷六十二見八十八使各各百八當知舉心動念浩然無際昏而且盲都無見覺云世講者謂有是見無非是見亦有亦無是見非有非無非是見此語違經負心經云依止此語諸見具足六十二如汝解者數則欠少中論破自他性有是自性對有說無無他性若有若無皆是性何意無非是見又此無旣非證理之無寧得非見諸外道本劫本見末劫未見介爾計謂

是事實餘妄語增見長非吾我毒盛捉頭拔髮構造  
生死如長爪雖不受一切法而受於不受不識苦集  
佛以一責墮二負處高著外道尚未免見云何底下  
謬謂爲是今判此並屬單四見攝也複四見者謂有  
有有無無有無無亦有有無亦無有無非有有無非  
無有無此是複四見於一一見具八十八使若六十  
二見見見又具八十八使百八等如上說具足四見  
者有見具四者謂有有無有亦有亦無有非有非  
無無具四者無有無無無亦有亦無無非有非無亦  
有亦無具四者亦有亦無有亦有亦無無亦有亦無  
亦有亦無亦有亦無非有非無非有非無具四者非

有非無有非有非無無非有非無亦有亦無非有非  
無非有非無是名具足四見一句具八十八使如是  
六十二見見具八十八使百八等如前說絕言具  
者單四見外一絕言見複四句外一絕言見具足四  
句外一絕言見一一見皆起八十八使六十二見百  
八等如前說如是等約外道法生如是等見也又約  
佛法生見者三藏四門生四見通教四門生四見別  
教四門生四見圓教四門生四見又一種四門外各  
有絕言見如是一一見中各各起八十八使六十二  
見百八等惑如前說復次見惑非但隨解得名亦當  
體受稱稱之爲假假者虛妄顛倒名之假耳例前亦

應言單四假復四假具足四假一一各有絕言之假  
依於佛法復有十六假一一如前說又於一一假中  
復有三假謂因成假相續假相待假法塵對意根生  
一念心起卽因成假前念後念次第不斷卽相續假  
待餘無心知有此心卽相待假上因成約外塵內根  
相續但約內根相待豎待滅無之無又橫待三無爲  
之無心也開善云因兼二假或一過之明第三假起  
時因上兩假故言因兼上假未除後假復起故言過  
之此就心明三假也又約色明三假先世行業託生  
父母得有此身卽因成假從胎相續迄乎皓首卽相  
續假以身待不身卽相待假又約依報亦具三假如

四微成在時節改變相續不斷此在待不在長短大小等也此是三藏經中隨事三假委釋如論師傳此名通用不獨在小乘大乘亦明三假附無明起如幻如化但有名字實不可得鏡中能成之四微尚不可得況所成之幻在在尚不可得況歷時節相續以幻化長短相待寧復可得舉易況難而明十喻卽色是空非色滅空卽此義也是名大乘隨理三假又釋論明三種有相待有假名有法有相待有智長因短有短亦因長此彼亦爾物東則以此爲西在西則東一物未異而有東西之別有名無實是爲相待有假名有者如酪色香味觸四事因緣和合故假名爲酪雖

有不同因緣之有雖無不如兔角龜毛之無但以因緣和合故有假名爲酪又如極微色香味觸故有毛分毛分故有毳毳故有氎氎故有衣是爲假名有法有者卽是色香味觸四微和合故名法有論又云三假施設與三假云何荅別義不論今通會之法假施設如因成受假施設如相續名假施設如相待論云五衆等法是法波羅聶提五衆和合故名衆生如根莖枝葉故有樹名是受波羅聶提用是名字取二法相說是二種是名波羅聶提故知三假義同也纓絡經亦有三假之文大品云有緣思生無緣思不生卽因成意大經云如讀誦法雖念念滅亦能從一阿舍

至一阿含猶如飲食雖念念滅亦能初飢後飽相續  
意也淨名云諸法不相待一念不住故當知三假之  
名大小通用非但小乘名生死法以爲見爲假如前  
說大乘亦名生死爲見爲假所謂三藏四門生四見  
見見有三假六十二見百八煩惱等云通教四門生  
四見見見具三假六十二見百八煩惱等別教四門  
生四見見見具三假六十二見百八煩惱等圓教四  
門生四見見見具三假六十二見百八煩惱等如來  
教門示人無諍法消者成甘露不消成毒藥實語是  
虛語生語見故故於四門十六門起見起假云二明  
破假觀者卽爲三一破假觀二明得失三明位觀又

爲四一破單二破複三破具四破無言破單爲兩初  
略後廣略者若一念心起於單四見中必是一見見  
卽三假虛妄無實八十八使浩浩如前說諸惡彰露  
具如後說應當體達颺依炎炎依空空無所依空尚  
無空何處復有若炎若颺又如眠夢百千憂喜本末  
雙寂畢竟清淨是名爲止又觀無明卽法性不二不  
異法性本來清淨不起不滅無明惑心復清淨誰起  
起誰滅若謂此心有起滅者橫謂法性有起滅耳法  
性無起誰復生憂法性無滅誰復生喜若無憂喜誰  
復分別此是法性此是無明能觀所觀猶如虛空如  
此觀時畢竟清淨是爲從假入空觀信行利根一聞

卽悟法行思已卽能得解其鈍根者非唯聞思不悟更增衆失故中論云將來世中人根轉鈍造作語惡不知何因緣故說畢竟空是故廣作觀法說於中論今亦如是爲鈍根故廣破畢複訖至無言說見通用龍樹四句破令盡淨若一念心起卽具三假三假如前說當觀此一念爲從心自生心爲對塵生心爲根塵共生心爲根塵離生心若心自生者前念爲根後念爲識爲從根生心爲從識生心若根能生識根爲有識故生識根爲無識故生識根若有識根識則並又無能生所生根若無識而能生識諸無識物不能生識根旣無識何能生識根雖無識而有識性故能

生識者此之識性是有是無有已是識並在於根何  
謂爲性根無識性不能生識又識性與識爲一爲異  
若一性卽是識無能無所若異還是他生非心自生  
如是推求畢竟知心不從自生若言心不自生塵來  
發心故有心生引經云有緣思生無緣思不生若爾  
塵在意外來發內識則心由他生今推此塵爲是心  
故生心爲非心故生心塵若是心則不名塵亦非意  
外則同自生又二心並則無能所塵若非心那能生  
心如前破若塵中有生性是故生心此性爲有爲無  
性若是有性與塵並亦無能所若無無不能生如是  
推求知心畢竟不從塵生若根塵合故有心生者根

塵各各有心故合生心各各無心故合生心若各養  
有合則兩心生墮自他性中若各各無合時亦無譬  
如鏡面各有像故合生像各無像故合生像若各有  
像應有兩像若各無像合不能生若鏡面合爲一而  
生像者今實不合合則無像若鏡面離故生像者各  
在一方則應有像今實不爾根塵離合亦復如是如  
是推求知心畢竟不從合生又根塵各有心性合則  
心生者當檢此性爲有爲無如前破云若根塵各離  
而有心生者此是無因緣生爲有此離爲無此離若  
有此離還從緣生何謂爲離若無此離無何能生若  
言此離有性性爲有爲無若性是有還從緣生不名

爲離若性是無無何能生如是推求知心畢竟不從  
離生中論云諸法不自生亦不從他生不共不無因  
是故說無生卽此意也若推因成假四句求生不得  
執性卽薄但有名字名爲心生名不在內外中間亦  
不常自有是字不住不住有四句亦不住不住無  
四句故無住之心雖有心名字名字卽空若四句推  
性不見性是世諦破性亦名性空若四句推名不見  
名是真諦破假亦名相空性相俱空者是爲總相從  
假入空觀也故中論曰諸法不自生如此用觀者與  
中論意同也若根檢不得心卽是內空塵檢無心卽  
是外空根塵合檢不得卽內外空離檢不得卽是空

空四性檢不得卽是性空四句檢不得卽是相空若  
就塵檢無十方分卽是大空求最上所以不得卽是  
第一義空四句因緣不得卽有爲空因有爲說無爲  
旣不得有爲亦不得無爲卽無爲空四句求心生元  
不得卽無始空四句求心滅不可得卽散空四句求  
心生滅不可得亦不得心不生不滅卽畢竟空三界  
無別法唯是一心作今求心不可得卽一切空觀心  
無心觀空無空卽無所得空觀有見三假不可得卽  
有法空觀無見三假不可得卽無法空觀亦有亦無  
見三假不可得卽無法有法空如此觀者卽與大品  
意同是爲十八種從假入空觀也若不悟者轉入相

續假破之何以故雖因成四破不得心生今現見心  
念念生滅相續不斷何謂不生此之念念爲當前念  
滅後念生爲前念不滅後念生爲前念亦滅亦不滅  
後念生爲前念非滅非不滅後念生若前念不滅後  
念生此則念自生念兩生相並亦無能所若前念有  
生性生於後念此性爲有爲無有則非性無則不生  
如前若前念滅後念生者前不滅生名爲自性今由  
滅生不滅望滅豈非他性他性滅中有生故生無生  
故生有生是生生滅相違乃是生生何謂滅生若滅  
無生無何能生若滅有生性性破如前若前念亦滅  
亦不滅後念生者若滅已屬滅若不滅已屬不滅若

不滅合滅能生卽是共生共生自相違相違何能生  
又若各各有生卽有二過各各無生合亦不生若滅  
不滅中有生性者爲有爲無若性定有何謂滅不滅  
若性定無亦何謂滅不滅此不免斷常之失還墮共  
過若前念非滅非不滅而後念心生者爲有此非滅  
非不滅爲無此非滅非不滅若有則非無因若無無  
因不能生若無因有生性者此性卽因何謂無因若  
無無不能生如是四句推相續假求心不得無四性  
實執心卽薄但有心名字是字不住內外兩中間亦  
不常自有相續無性卽世諦破性名爲性空相續無  
名卽真諦破假名爲相空性相俱空乃至作十八空

如前說是名從假以入空觀若不得入者猶計有心  
待於無心相待惑起此與上異因成取根塵兩法和  
合爲因成相續豎取意根前後爲相續豎望生滅此  
是別滅別滅則狹今相待假待於通滅此義則寬通  
滅者如三無爲雖不併是滅而得是無生待虛空無  
生而說心生卽是相待假上旣不悟復因上惑共起  
此惑故言因兼上惑猶在復起此惑故言過之又因  
兼者無生法塵待意根生亦是因成因上假心來續  
相待卽是相續故言因兼過者上兩假不於通滅起  
惑今約通起豈非過之釋旣異舊而借彼語示相待  
假相耳今檢此心爲待無生心生爲待有生心生爲

待亦生亦無生而心生爲待非生非不生而心生若  
待無生而生心者有此無生無此無生若有生可待  
還是待有何謂待無有有相待卽是自生若無此無  
生無何所待若祇待此無無而生心者一切無無亦  
應生心無望於有無卽是他生也又無生雖無而有  
生性待此性故而知有心此性爲已生爲未生若已  
生生卽是於生何謂爲性性若未生未生何能生若  
待心而心生者生還待生長應待長旣無此義何得  
心生若待生無生故有心生如待長短得有於長此  
墮二過各有則二生並各無全不可得如前若待非  
生非無生而有心生者論云從因緣生尚不可何況

無因緣又此無因爲有爲無若有還是待有若無還是待無何謂無因若言有性性爲有爲無性若是有爲生非生若生已是生何謂爲性若無生云何能生如是四句推相待假求心生不可得執心卽薄不起性實但有名字名字之生生則非生是字不在內外中間亦不常自有是字無所有求性不可得世諦破性是名性空求名不可得真諦破假是名相空復次此性相中求陰入界不可得卽是法空性相中求人我知見不可得名衆生空乃至作十八空如前說是名從假入空慧眼得開見第一義非但有見三假惑除一切見惑無不清淨正智現前是名無生門通於

止觀亦是止觀成無生門若不悟者當善用止觀而  
破見假信法迴轉成方便道伏於有見無量煩惱悉  
皆被伏伏故名善有漏五陰也以被伏故有見不起  
度入無見計中如後破夫破見之由聞思不定若止  
根人聞觀於生知生無生破執得悟中根執輕成伏  
見方便善有漏五陰下根執重猶懷取著聞破生不  
得生謂無生是實更起無生見又當總別破之總破  
者如大品云識無生生尚不可得何況識生又識生尚  
不可得何況識無生生與無生俱不可得楞伽經中  
又廣破無生見然無生之理非識所知云何謂情捨  
有緣無如步步屈蟲又似獼猴不應虛妄執此見著是

爲總破別破者行人用止觀破因成三假不得性相  
泯然入定不見內外亦無前後無相形待寂然定住  
或豁亡身心一切都淨便發此無心自謂得無生止  
觀定慧已成而起見著著此空想諸佛不化何故不  
化觀心惟畫發一分細定生一分空解此是空見法  
塵與心相應何關無生釋論簡外道佛法二俱觀空  
云何有異外道愛著觀空智慧卽是向者所發空塵  
謂爲涅槃卽有能觀者能觀者便成身見身見故卽  
有利鈍十使乃至八十八等生死浩然如前說如是  
罪過皆由空塵而起障真失道豈會涅槃是名外道  
觀空佛弟子觀無生若發空心空心生時卽知是愛

何者生名愛法愛法卽是無明無明生我見等八十  
八使一一皆具三假之惑終不執謂是真無生云何  
三假良由上來有見三假被伏度入無見無生法塵  
對意根一念空心生卽因成假以生心滅故無生心  
生是相續假豁爾無生待於有生是相待假當推此  
無生心生爲意根生爲法塵生爲合爲離若意根生  
者爲根生爲識生若根生爲根中有識故生識爲無  
識故生識若根有識爲是根爲非根識若是根則無  
能所根若無識何能生識若根有生識之性此性爲  
有爲無性若有者識性與識爲一爲異若一性卽是  
識若異異何能生自生中檢心不可得其如上說若

由塵起無生心者塵爲有心爲無心若有心則無能  
所若無無不能生又塵爲一爲異一則無能所異則  
不能生檢他心不可得具如上說若根塵合有無生  
心生者此有二過如前說云又離根離塵有無生心  
生者從因緣尚不可得何況無因如前當知無生之  
心不自不他不共不離無四性無四性故名性空性  
空卽無心而言心者但有名字名字不在內外是名  
相空乃至十八空如上說是爲從假入空見第一義  
非但無見假破上惑下障一切皆除得正智慧若未  
去者勤用止觀善巧修習信法迴轉成方便道伏於  
苦集所有陰界入等八十八使皆悉被伏以被伏故

名善有漏也勤修力故無見中假不復得起廢入有  
無假中如後破云次破亦有亦無見二假者行人善  
用止觀伏無見惑無假不起或進一分定慧豁發亦  
有亦無與心相應卽便謂言若無心者誰知無生無  
生是無知卽是有發此心時受是亦有亦無見謂是  
事實堅著不可捨不知過患如長爪自謂有道實是  
苦集不能識故佛點示之卽便得悟發見之人亦復  
如是迷此見毒不識正真若聞指示執心颺解云何  
指示大五受皆皆不受汝云何受是亦有亦無法塵  
豈非受陰緣此像貌行用此法了別此法四陰宛然  
如此受想皆名汙穢是見依色陰又意根受是亦有

亦無法塵卽是界根塵相涉卽是入是名苦也又我能行能受能知此法假名卽起我見我見旣生卽有邊見若撥因果是邪見計此爲道此戒取計爲涅槃是見取違瞋順喜我解慢他不識苦集卽癡後當大疑如是等十使歷三界具八十八違於實道順於生死悉於亦有亦無見心中生又此見心卽備三假例前可知今破此見三假者還用四句一一例前可解如是破已三假四句陰入皆無實性卽是性空但有名字名字卽空是名相空性相旣空乃至十八空如上說卽是入第一義正智現前若不入者善用悉檀信法迴轉巧修止觀伏於諸見令成方便善有漏法

亦有亦無見雖伏不起仍度入非有非無見中如後  
破次破非有非無見者上勤用方便伏有無見豁然  
更發離有無心所以者何心若定有不可令無心若  
定無不可令有云何乃謂亦有亦無若不定有則非  
有若不定無則非無非有者非生也非無者非滅也  
出於有無之表是名中道與中論同何以故前有見  
是因緣生法無見是卽空亦有亦無是卽假今是卽  
中堅著此心計以爲實是人能起無量過患何以故  
汝謂此心爲實者乃以虛語爲實語生語見故故非  
真實若真實者此是應是常樂我淨此心生滅故非  
常受此心故非樂不自在故非我汗穢故非淨我心

生故是身見身見有無未免非有非無如屈步蟲是  
名邊見謂非有非無見以爲中道通諸生死是愚癡  
論非道非字謂是道字是名戒取謂非有非無心爲  
涅槃具陰界入利鈍等使是名見取謂非有非無以  
爲正法乃破一切世間因果故名非有破一切出世  
間因果故名非無破正見威儀尚不當世間道理云  
何能當出世道理寧起我見如須彌山不惡取空不  
正爲正是名邪見若順歎則愛違毀則瞋不識此心  
毒草藥王則癡自擅陵他則慢後當大疑略過有十  
廣不可盡如是等過皆從非有非無見心中出又一  
一過悉具三假如前云若破此見假還用前四句止

觀逐而破之如前云復次點出諸見五陰者是示其苦點出十使者是示其集用止觀破者是示其道諸見若伏若無是示其滅夫一切外道邪解佛法僻計無量過患皆用四諦破之無不革凡成聖如來初說阿含四諦之力尚能如此何況大乘三種四諦何所不破耶若非有非無見破者一切諸惑亦悉斷壞發正智慧是名從假入空見第一義若不入者當用止觀信法迴轉善巧四隨方便修習伏諸見惑執心卽薄住方便道成善有漏法此見不起度入無言說中如後破云所以節節說見過者殷勤行人念於觀心善識毒草明解藥王若得此意終不謬計也章節雖

煩番番不雜能了此者可與論道兀然如盲若爲識  
乳次破無言說見假者若能如上破者或進發定慧  
豁然明靜復起異解謂適有此有卽有生死四句皆  
假虛妄不實理在言外絕於四句乃是無生謂出四  
句實不出也略有三種四句外一單二複三具足若  
謂理在言外者乃是出單四句外不出複見第二句  
亦不出具足見初句故知見網蒙密難可得出法華  
云魑魅魍魎處處皆有複具諸見一一皆有三假若  
集破假之觀皆如上說若人能於諸見修習道品皆  
應節節得悟從假入空見第一義若未得入者單複  
具足一切諸見悉皆被伏成善有漏五陰見不得起

或進發禪解又復言出單複具足四句之外言語道斷心行處滅泯然清淨卽是無生絕言之道如此計者還是不可說絕言之見何關正道徒謂絕言言終不絕何以故待不絕而論絕絕還是待待對得起不應言絕如避虛空豈有免理又豎破不絕者心不絕故無言見具起一切生死因果云何稱絕上來節節皆有橫豎兩破於一有見是橫破重累四見是豎破因成假是橫破相續假是豎破相待假是亦橫亦豎破總破是非橫非豎破大途祇是橫破今當豎破汝執心是有有卽是生汝是何等生爲是五停總引念處煖頂忍世第一生爲是苦忍真明生爲是重慮思

惟生爲是乾慧似道生爲是八人見諦生爲是神通  
遊戲誓扶習氣生爲是三賢伏道似解生爲是十聖  
真解生爲是鐵輪似道生爲是銅輪真道生爲是徧  
法界自在生用此諸生勸汝執心全無氣分而言非  
見孰是見乎若計心是無生無卽不生汝是何等不  
生爲是見不生爲是思不生爲習氣不生爲塵沙不  
生爲無明不生爲業不生爲報不生爲行不生爲理  
不生世人云不生不生卽是佛祇道是法佛今釋此  
語卽是三佛理不生卽法佛無明不生卽報佛塵沙  
見思不生卽應佛又無明不生卽法佛見思不生卽  
報佛塵沙不生卽應佛又業行位不生卽應佛智業

不生卽報佛理不生卽法佛又因佛從緣因生報佛  
從了因生法佛從正因生三佛生卽無生無生卽三  
佛生若聞阿字門卽解一切義云何祇作一解耶利  
鑊斷地徹至金剛聞一不生徧解法界不生將諸不  
生勘汝執心了無一分非見是何有人難中論去不  
生不滅未會深理何者煩惱是生法三相遷謝是滅  
法祇不此生滅故言不生不滅但是入空不見中意  
中論師解云不生不滅者不不生不滅以顯中道  
此解扶中而傷文失義何者龍樹之意兼通舍別故  
言不生不滅不生者不二十五有之生不三相遷滅  
之滅能破二十種身見成須陀洹乃至無學豈非兼

申通意亦兼三藏意若生若滅皆屬於生涅槃但空  
唯屬寂滅不此之生不此之滅雙遮二邊豈非舍別  
之意若生滅是因緣所生法卽空卽假卽中卽空故  
不生卽假故不滅不生不滅卽是中道按文解釋兼  
二合別顯中四義宛然龍樹之巧以不生不滅一句  
廣攝諸法乃會摩訶衍耳若開脣動舌重吃鳳兮之  
聲抽筆染毫加於點黥之字祇得一意全失三門懸  
疣附贅雖欲補助還成漏失今解不生一句何啻舍  
於四義且略出十不生不生意也一者一切法可  
破可壞一切語可轉非有非無絕言離句無一法入  
心是一不生不生亦不生故名不生不生雖情謂不生

而實是生如非想謂言無想而成就細想此乃邪見  
外道之不不生也二者犢子道人計我在第五不可  
說藏中此是一不生不生亦不生故名不生若三  
藏二乘斷三界見思一不見一不思故名不不  
生而習氣猶生若三藏佛正習俱盡名不不生一不  
不正一不不習故言不不生此析法不不生若通教  
體見本不生體思本不生故言不不生思益云我於  
無生無作而得作證二乘雖體不見思而習氣猶生  
通教佛坐道場正習俱盡亦是不不生此乃分段不  
不生耳若別教人斷通別惑一不通一不別名  
不不生此一品一分二品二分不不生耳上分猶生

若別教佛上分盡名不不生此猶是方便權說不不生若圓人一不不通一不不別名不不生猶居因地猶有上地行智報等生在若妙覺智滿其智更不生無明究竟盡惑更不生行智報等畢竟不不生又真理極故一不不生圓理極故一不不生又理本本不生今亦不不生若作單不生語攝法亦盡如前說若作不不生語攝法亦盡汝作不生齊何處不生汝作不不生復齊何處不不生他尚不識外道不不生況識最後不不生那得不愜是見當苦破之豎破亦有亦無見非有非無見如上菩提心中釋名絕待中示其相也若謂心亦生亦不生者爲是何等亦生亦不

生爲是見不生而真生爲是思不生而真生爲是習  
不生而真生爲是塵沙不生通用生爲是無明不生  
中道生爲是內業不生外業生爲是內報不生外報  
生爲是小行不生大行生爲是偏理不生圓理生而  
言亦生亦不生若非如此等亦生亦不生非見何謂  
若言心非生非不生者爲是何等非生非不生爲是  
析斷常非生非不生爲體斷常非生非不生爲是八  
地道觀雙流非生非不生爲是初地破生死得涅槃  
非生非不生爲是十地後果非生非不生爲是初住  
雙遮二邊非生非不生爲是十行增進中道非生非  
不生爲是十迴向非生非不生爲是十地非生非不

生爲是妙覺極地非生非不生既非此等非生非不生非見是何若絕言者絕言甚多是何等絕言單四句外亦稱絕言楨外具外亦稱絕言如婆羅門受啞法者亦是絕言又長爪一切法不受亦是絕言犢子云世諦有我我在不可說藏中不可說亦是絕言三藏入實證真亦不可說故身子云吾聞解脫之中無有言說三藏解脫凡有四門入實卽有四種不可說通教三乘人同以無言說道斷煩惱亦有四門不可說別教人觀常住理無言無說亦有四門不可說圓教不可宣示淨名杜口文殊印之此亦有四門不可說不可說衆多汝所計不可說爲是何等汝尚不及

續子不可說何況三藏四不可說何以故續子謂不可說爲世諦不計爲涅槃汝計爲實故知不及續子續子尚是見汝寧非見爲此見故廣起煩惱浩然如前說更重破絕言者汝謂絕言在四句外今明十種四句汝之絕言在何等四句外十種者一往四句無窮四句結位四句攝牒四句得悟四句攝屬四句權實四句開顯四句失意四句得意四句一往四句者凡聖通途皆論四句此意可知無窮四句者四四瀾漫無貲如四十八番中示其相云結位四句者分齊四句尅定是非如單複具足等住著不亡卽凡夫四句若無句義爲句義是聖人四句攝牒四句者結凡

夫四句牒爲有句牒二乘爲無句牒菩薩爲亦有亦無句牒佛爲非有非無句得悟四句者隨句入處卽成悟入之門四句卽成四門攝屬四句者隨諸句門悟入何法以法分之屬諸法門也權實四句者諸法四句之門三四爲權一四爲實也開顯四句者開一切四句皆入一實四句若入實四句皆不可說也佛教四句齊此失意四句者執佛四句而起諍競過同凡夫也得意四句者菩薩見失意之過作小大論申佛兩四句破執遣迷則有得意四句作論之功息矣若不愜是絕言見者前諸四句汝出何等四句外而謂理在言外耶前橫破四句今豎破四句之言外也

今世多有惡魔比丘退戒還家懼畏驅策更越清道士復邀名利誇談莊老以佛法義偷安邪典押高就下摧尊入卑槩令平等以道可道非常道名可名非常名均齊佛法不可說示如蟲食木偶得成字檢校道理邪正懸絕愚者所信智者所嗤何者如前所說諸生諸不生諸四句諸不可說汝尚非單四句外不可說何況複外何況具足外何況犢子耶尚非犢子何況三藏通別圓耶諸法理本往望常名常道云何得齊教相往望已不得齊況以苦集往檢過患彰露云何得齊況將道品往望云何得齊正法之要本既不齊迹亦不齊佛迹世世是正天竺金輪剎利莊老

是真丹邊地小國柱下書史宋國漆園吏此云何齊  
佛以三十二相八十種好纏絡其身莊老身如凡流  
凡流之形座小醜箴經云閻浮提人形狀如鬼云何  
齊佛佛說法時放光動地天人畢會叉手聽法適機  
而說梵響如流辯不可盡當於語下言不虛發聞皆  
得道老在周朝主上不知羣下不識不敢出一言諫  
諍不能化得一人乘壞板車出關西竊說尹喜有何  
公灼又漆園染毫題簡勾治改足軋軋若抽造內外  
篇以規顯達誰共同聞復誰得道云何得齊如是不  
齊其義無量倦不能說云何以邪而干於正復次如  
來行時帝釋在右梵王在左金剛前導四部後從飛

空而行老自御薄板青牛車向關西作田莊爲他所  
使看守漆樹如此舉動復云何齊如來定爲轉輪聖  
帝四海顒顒待神寶至忽此榮位出家得佛老仕關  
東恪小吏之職墾農關西惜數畝之田公私忽遽不  
能棄此云何言齊盲人無眼信汝所說有智慧者慙  
而怪之是故當知汝不可說是絕言之見三假具足  
苦集成就生死宛然抱炬自燒甚可傷痛若破此見  
如前所說云復次外人或時用道可道非常道爲絕  
言破中論不生不滅云是第四句絕言出過四句一  
往聞語謂言出過理則不然言不生者見心不生旣  
不生卽不滅故言不生不滅絕言見心生一切愛見

疑慢云何以生滅破他不生不滅愚癡戲論不應如此又問起不生不滅見此復云何答應有六句絕言破不生不滅不生不滅破絕言絕言修不生不滅不生不滅修絕言絕言即不生不滅不生不滅即絕言云一切凡夫未階聖道介爾起計悉皆是見以有見故三假苦集煩惱隨從魚王具母衆使具足結業蕪蔓生死浩然一人經歷尚無邊畔何況多人當知見惑大可怖畏勤用止觀而摧伏之若起單見用止觀四句逐體破之若避單入複避複入具避具入絕言無趣遂起止觀逐之無遠不屆常寂常照治之不休如金剛刀所擬皆斷取悟爲期能如是觀雖不發真

諸見被伏成方便五陰若得入空衆見消盡故初果  
所破如竭四十里水功夫甚大恐聞者生疑略斷三  
結餘殘不盡如一滴水思雖未盡見已無餘從多爲  
言亦得明破法徧也問從假入空破無量見下二觀  
復何所破荅入空之觀破見及思束而言之祇是破  
有次觀所破祇是破無中觀所破雙非二邊正顯中  
道故釋論云有無二見滅無餘稽首佛所尊重法故  
知諸見縱橫尚不爲第二觀所破云何謬謂爲眞法  
耶問束生死爲有束二乘爲無有九縱橫無量無亦  
應然荅凡夫妄計觸處生著是故有多二乘已斷見  
思無復橫計唯證於空大乘破之名爲空見耳二料

簡得失者問如此止觀隨逐諸見有何得失答當四句料簡一故惑不除新惑又生二故惑除新惑又生三故惑不除新惑不生四故惑除新惑不生一譬如服藥故病不差藥更成病二所治病差而藥作病三病雖不差藥不成妨四故病既差藥亦隨歇前二種是外道得失相後二種是佛弟子得失相所以者何本用止觀治生死惑而貪欲之心都不休息因此止觀更發諸見破因破果無所不爲是則故惑不除而新惑更起也二修止觀時貪求衣食諸鈍煩惱息而不起忍耐寒苦刀割香塗不生憎愛財物得失其心平等而執見之心甚可怖畏如渴馬護水擔揆破壞

撥無因果是則故惑去而新惑生此兩屬外道愛處  
生愛瞋處生瞋若學止觀墮如此者同彼外道也三  
佛弟子修此止觀爲方便道深識見愛無門因緣介  
爾心起卽知三假止觀隨逐破性破相雖復貪瞋尚  
在而見著已虛六十二等被伏不起是名故惑不除  
而新惑不生是爲方便道中人也四若能如此三假  
四觀逐念檢責體達虛妄性相俱空豁然發真卽得  
見理非唯故病永除新病不發是爲入見諦道成聖  
人<sub>云</sub>三明破惑位者若修此方法明識四諦巧用觀  
慧諸見被伏習依三藏法是總別念處正伏四倒四  
倒不生煖卽得發成方便等位進破諸見發真成聖

卽初果位也若依通教伏見之位是乾慧地若得理  
水沾心卽成性地若進破見者卽是入人見地位也  
若依別教伏見者是鐵輪十信位破見是銅輪十住  
位若依圓教伏見是五品弟子位破見是六根清淨  
位斷伏名同觀智大異三藏觀思議真析法觀智伏  
斷通教觀思議真體法觀智伏斷別教雖知中道次  
第觀智伏斷圓教卽中一心觀智伏斷不可聞名仍  
混其義問若伏見假入賢位者故惑雖未差新惑不  
應生那得修止觀時有諸見境發答此發宿習宿習  
之見還是故惑如人服藥藥擊宿病宿病旣動須臾  
自差非是藥爲新病也問何不直明別圓入空破假

位而明三藏通教等入空位爲答上明修發不修發  
十境交互等欲示行人淺深法故叙諸位耳又欲明  
半滿之位令行者識之耳又半字入空法悉是別圓  
助道方便又多僕行而侍衛之卽其義也又豈離方  
便而別有真實卽此半字而是滿字故云二乘若智  
若斷卽是菩薩無生法忍也體假入空結成止觀義  
者諸見輪息一受不退永寂然名爲止達見無性性  
空相空名爲觀見真諦理名爲不生理旣不生理亦  
不滅是爲不生不滅名無生忍又見惑不生名因不  
生不受三惡報生名果不生因果不生亦復不滅不  
生不滅名無生忍是爲無生門通於止觀亦是止觀

成無生門從假入空破見惑徧竟

摩訶止觀卷第五下